

本朝分省人物考

人物考卷之四目錄

北直隸保定府

李彥名

何禮

邱鵬

李得成

王寅

趙豫

劉觀

李友直

郭璉

王哲

吳祥

李宏

楊璣

李敏

王文

張哲

馮珪

寇深

王驥

何翕

王瑾

宋傑

孟鑑

張鵬

劉慶

賈俊

田昭

呂雯

楊宣

侯瓚

田景暘

吳麟

韓文

王道

黃縉

吳櫝

馮貫

李鳴鳳

曹臻

王宗彝

劉瑀

朱英

張貫

侯觀

王寅

本朝京省人物考卷之四

北直隸保定府

李彥名

李彥名字資善保定府安州人自幼穎異博極墳典  
洪武中以通經儒士舉用至京洪武二十年試禮部  
尚書時詔天下行養老之政自八十以至九十有差  
上慮有司奉行不至令彥名申明德意二十二年  
詔定歷代帝王名臣從祀彥名奏以風后力牧皐陶  
夔龍伯夷伯益伊尹傳說周公旦召公奭太公望方  
叔召虎張良蕭何曹叅周勃鄧禹諸葛亮房玄齡杜

如晦李靖郭子儀李晟趙普曹彬韓世忠岳飛張浚  
傅爾朮赤老溫伯顏阿木安童凡三十六人 帝去  
趙普安童阿木進陳平馮異潘美及元臣木犁華餘  
悉如彥名所擬三月 上親策多士臨軒命題策問  
祀禮賜進士及第任亨泰等九十七人又命彥名礮  
石題名祭酒宋訥撰記二十二年冬命彥名申嚴巾  
帽之禁凡文武官除本等紗帽外遇雨許戴雨帽公  
差出外許戴帽子入城不許其公差人員出城外者  
亦如之將軍力士校尉旗軍常戴頭巾或櫪腦官下  
舍人并儒士吏員人民常戴本等頭巾鄉村農夫許

戴斗笠蒲笠出入市井不禁不親農桑者不許入魯  
王檀薨詔議喪制彥名等奏宜輟朝五日皇帝於諸  
子無服宜素服五日而除其諸王及世子服制悉條  
議以上上從之遂著爲例彥名在朝贊定禮制最  
效勤勞出入拱手按步不差尺寸端謹羣臣莫比二  
十三年致仕

### 何禮

何禮保定府清苑縣人洪武初以才行異等舉十三  
年陞兵部侍郎十五年擢兵部尚書奏准令廣東廣  
西福建浙江湖廣江西布政司淮安蘇州等衛馬草

不許科收馬料不許支給其各衛軍士有年老及殘疾有丁男者許替役管軍官不許生情留難違者悉坐以罪十六年奉 旨令僉四府之民有占田四十頃以上者出上馬一匹三十頃以上者出中馬一匹二十頃以上者出下馬一匹後又命各處驛馬不問官給自備其孳息聽令貨鬻惟爲事給軍馬匹有孳生仍令報官又奏准天下衛所善於射者十選其一於冬月農隙輪班赴京校試不中者罰其指揮千百戶中者賞鈔五錠連中者十錠不中者亦給道里費各邊軍士就於本衛較射本年以事免官



邱鵬

邱鵬唐縣人洪武七年進士尋擢御史稟性忠鯁剛決清廉知無不言言無不當值時法嚴遣官籍沒其產止木匙二張木筯五雙故鄉物也復擢廣東臺憲

李得成

李得成涑水人父德儀早卒母張氏洪武初避兵溺死得成臥水求其屍塑父母像與妻事之甚謹洪武十九年縣舉孝廉爲大官署丞二十四年改太常贊禮郎二十五年又以割肝報效之忠陞尚寶司丞二十七年八月旌其門孝子靖難兵起李景隆敗於德

卷四  
三  
州濟南被圍急黃子澄等謀緩燕師遣人講和得成  
慷慨請行見 成祖濟南城下請回軍還燕 成祖  
必欲得齊黃乃肯解兵遣得成歸報朝廷以得成辱  
命下獄已而宥之永樂初陞陝西左叅政歷陞陝西  
右布政使數上言民間疾苦民感其惠

王寅

王寅高陽人洪武間以明經薦爲洛陽訓導又以經  
明行修薦授禮科給事中敢言不避權要忤冢宰出  
守思州至則宣布威德蠻夷率服

趙豫

趙豫字定素保定安肅人洪武間以生員督賦守城  
永樂丁亥授泌陽縣主簿未任擢兵部主事陞員外  
郎丁內艱起復洪熙初陞郎中宣德庚戌奉勅知  
松江府一意撫循與民休息困窮耄稚至者咸得盡  
其情每誦范文正先憂後樂之言曰此吾輩所當法  
也滿考吏民數千人請留增秩三品復任前後十五  
年清靜如一上下皆化之正統十年吏部論天下有  
司治行尤著者十一人豫在上列詔宴於午門賜  
織金衣一襲縉紳榮之及致仕去吏民攀擁不得行  
豫在松郡每見訟者非急事卽諭之曰明日來始皆

笑之故有松江太守明日來之謠然而訟者止乘一時之忿經宿氣平或衆爲譬解因而息者甚多比之鈞距致人而自爲名者何啻霄壤哉

劉觀

劉觀雄縣人登洪武間進士授太谷丞召拜監察御史陞僉都御史後出守嘉興嘉興稱治尋丁外艱永樂初詔訪耆舊奉命起復除戶部侍郎轉副都御史時肇建北京命觀鳩木於浙先是所司懼不如數恐獲罪往往誇功利飾虛文觀至盡革其弊事不後期因是全活者累千萬人後陞禮部尚書未幾涼

州羌叛搖毒西陲 太宗命觀以刑部尚書督將臣  
往征之羌戎授首羣醜就殲推髻襁負而至者萬二  
千餘西土以寧凱還遷左都御史時雄屬畿內尚爲  
雲川軍所擾奏遷白楊口鄉里至今安之官至太子  
少保有議其貪墨者遂令觀巡閱河道尋逮觀并其  
子輻俱下獄尋戍子於邊而令觀隨居王齊曰世傳  
觀守嘉興決死刑刑者數伸手有黃金二千兩字觀  
卽截其手以進 太宗嘉歎久之遂蒙眷注冰蘖之  
操始終不渝特因得罪三楊適其子遊官伎忤都御  
史故見構陷歸休止有草舍數椽貪墨者固如是乎

今人止據楊文貞三朝聖諭所載而不知非公論也  
觀顧佐掌院首罷官伎可以徵其得罪之由矣

### 李友直

李友直字居正清苑縣人讀書通大義兼習律法

成祖靖難之初友直時從事北平廉司首發密事用  
是深契宸衷遂擢藩司叅議贊翊居守攄誠效勞禦  
敵之方捍城之具罔不周備永樂紀年肇建北京設  
行部除左侍郎尋以事謫戍四年復原職及營宮宇  
承命綜理沿河輸運諸務悉心殫慮雖隆寒盛暑不  
替利興害去人咸德之十八年竣事調行在工部十

九年定鼎北京命署兵部事二十二年九月以居

大行皇帝喪不齋戒公宿降順天府丞尋陞工部右侍郎 仁宗嗣位追念舊勞拜工部尚書未幾改北京行部奉命代祀秦中前代陵寢還朝懇懇以軍民利害爲言深承眷遇 宣宗繼統改行在工部命往西蜀總董夫匠鳩工料材寬不至縱嚴不至苛軍民便焉自是凡有營建一以董督之任委之友直夙夜敬慎撫循慰勞人忘其勞而事必就 英宗臨御屢勅繕葺京倉及濬築通濟等河施設措置智力弗衰正統戊午以疾卒於官

郭璉

郭璉字時用初名進保定府新安縣人由國子生出身早不違問學然天資甚美受氣完厚臨事從容喜怒不行於色精於吏事簡切不泛永樂初年爲戶部主事以勤敏著稱已爲文廟所知歷陞福建叅議山東叅政俱有政績五年進工部右侍郎九年命往湖廣武當山督官觀事集而人不擾事竣回部十九年定鼎北京特命安撫江西軍民考察官吏二十二年改吏部會仁廟嗣位益隆眷注命兼詹事府少詹事乃改今名暨宣廟嗣位又命掌行在詹事府



四年蹇義以年老輟吏部政務贊謀密勿遂進尚書  
代義理部務爲人寬洪簡重得大臣體甄別士類人  
服其當但三楊當軸薄其不學無術議 勅方面風  
憲郡守令京三品以上官舉保又議 勅今後御史  
知縣許在京五品以上官舉保由是天下要職吏部  
不得除已而奔競之風大作有以弊言者遂罷御史  
知縣舉保之例郡守以上仍舊出於三楊之門吏部  
拱手而已正統初侍臣因蝗旱言大臣不能盡職久  
妨賢路有 旨回奏衆欲歸罷田里以謝天譴璉獨  
以爲不可云非是貪位但 主上幼冲吾輩皆 先

帝簡任受付託若皆罷去誰與共理只宜戴罪修省  
改過以回天意衆從其言識者是之後八年致仕

王哲

王哲清苑人永樂中由鄉舉入太學擢監察御史按  
遼東及江西河南所至有聲累陞山東叅政遇境內  
蝗分道督捕毀淫寺以宏公館之未備後以學士楊  
溥薦陞湖廣左布政凡有便于民者悉力爲之未嘗  
疑滯性至孝歷官廉正嚴明人不敢以私干之民因  
爲歌曰王捕虎最執古心無私人不苦囊無錢衣有  
補民愛之如父母焉

吳祥

吳祥蠡縣人永樂中知嵩縣爲政寬和逋民自歸者二百餘戶縣有猛虎劫賊爲害祥乃禱神未踰歲獲虎二十餘賊黨亦各散去邑內遂安秩滿去吏民詣闕奏留上許之在任三十二年卒于官

李宏

李宏蠡縣人由進士任御史素行清介難干以私嘗巡歷有奸犯密令人以袋金書名事犯置察院厠壁間入厠見之旣出以示衆明正其罪時論廉之

楊瓚

楊瓚蠡縣人由進士永樂中任山西趙城縣知縣廉能有聲爲天下賢令第一遂陞鳳陽府知府政績大著已丑朝覲推天下賢守十八人居第四賜宴并衣一襲陞浙江左布政時陶得二鄧摩齊等作亂諭平之省兵財無算時忌於權貴未蒙武功之賞止賜表裏進二品俸尋卒

李敏

李敏字好學新安縣人永樂丁酉舉人宣德四年除鳳陽府同知有惠政正統三年陞汝寧知府十年以善狀著聞特陞應天府尹寬嚴相濟士民敬愛景泰

二年陞戶部左侍郎總督蘇松糧儲兼撫應天等府  
景泰五年夏大水渰浸田禾經久不退敏與知府汪  
許議當開浚白茆等塘以洩之許躬往常熟縣相視  
時久不疏濬壅成隄堰近民耄倪皆臥泣堤上以求  
免言一開浚則堰下之田亦就浸矣於是挑濬青墩  
浦橫瀝塘共五十六里以通白茆塘鑿開三堰約三  
里餘引水通鮎魚口其海口淤塞漫以叢葦仍挑去  
約千餘畝於是水得歸海敏在江南救災恤患撫恤  
軍民彌盜督餉事克有濟六年陞戶部尚書專督糧  
儲撫應天等府天順元年致仕

王文

王文初名強字千之宣德間御筆改今名先爲鳳陽府霍丘人大父壁仕元爲杭州路總管洪武初左選保定府清苑簿占籍束鹿焉文穎悟過人甫弱冠領鄉薦登永樂辛丑進士擢四川道監察御史激濁揚清綽有能聲時都御史顧佐掌院事少許可文與王翱于謙同時爲御史咸爲顧所器重三人中嚴毅剛介文獨過之時彰德妖人張普祥逆謀惑衆地方騷動宣廟憂之命顧佐擇風力御史往治其事顧舉文遂命與中貴劉永成偕行劉強悍最鍾寵遇文一

以正氣臨之言動無少忽劉亦深服比至羣盜悉平先是普祥於士民之家曾受一飯一茶者悉附簿書以識姓名事敗同事者得簿書欲盡捕之坐以通謀人心恟恟文曰此賊未反時以募緣與之飲食豈知後日爲逆耶坐之非朝廷意也取簿焚之亦不究人心始安回朝悉以上聞大爲朝廷嘉獎用是受知

宣廟越明年擢關中按察使將往丁外艱朝廷奪情命蒞任章數十上不允正統己未擢右副都御史巡撫關內期年召回本院視事又明年轉大理卿壬戌夏太旱朝廷命中貴興安審錄兩法司重囚無慮百

餘起文於招議情節悉能背誦於可矜可疑者率以一二語斷之無不中節興安驚服且歎曰法官如是者目所未見受知 英廟擢都察院掌院事右都御史時吏部尚書連璉招權納賂盤據要津莫敢誰何文疏其貪婪劾罷之風紀大振時朝廷重陝右重地每以掌印都御史越歲代鎮守正統己巳文在陝右虜酋也先犯順朝廷以璽書命移陝之關廟居民悉入城以避賊鋒文以虜賊悖逆天道不久必悔過此去京師數千里不宜妄自驚擾以搖人心卒如所料旣而得代回京加太子太保左都御史掌院事如故



時南畿富民固山周家豪橫以私債殺人御史按之以法周乞請大同納粟三十萬以贖死時大同有事用兵倉庫告乏司錢穀者請集廷臣議詔可其奏會議間衆未發言文正色曰祖宗律殺人者抵命貪賊者落職奈何貪富民三十萬糧廢祖宗法乎衆莫敢異卒坐以法景泰壬申南畿山東河南大饑命文以便宜從事賑貸文徧歷郡邑賑恤之全活不下數十萬越明年朝廷以內閣密勿重地改兼吏部尚書翰林院學士入閣典機務疏納言舉賢賑民數事稱上意五年南畿復饑仍命往貸至則訪民疾

苦蠲民徭役大開倉廩賑恤所活又不下數十萬餘  
還加少保兼東閣大學士天順丁丑值英廟復辟  
時權奸石亨等以文在都察院時曾劾之乘機報復  
設計誣陷而卒四方冤之年六十有五久之英宗  
亦悟成化己丑復原官諭祭錄其一孫入成均弘治  
戊午特贈太保諡毅愍文爲人嚴毅廉介寡言笑熟  
知國家典故雖貴極人臣自奉無異布衣時每廷議  
百官會集莫敢先發文以一二語裁決衆自帖服屢  
鎮大藩兩總憲紀振舉綱維無敢干以私者景泰初  
與陳鑑同事一揖之外未嘗交談諸御史仰其風采

若神明及入閣毅然自任盡心奉國知無不爲事有  
可否多所匡正朝廷眷重錫以白金印章其文曰忠  
誠匪懈云

張哲

張哲蠡縣人永樂甲辰進士任大理寺評事有寡婦  
曾氏私與人通忌其子乃誣以不孝繫獄哲疑之後  
數日令獄卒出別囚屍僞言于母曰汝子已死汝來  
收掩密令人伺其母竊與一人喜笑卽併捕訊之果  
服辜子得免死平冤獄胡景先等一十三人俱奏免  
歲久旱是日雨時以爲雪冤所感陞江西按察司僉

事適有寇葉宗流等竊發山東 勅哲同都督楊洪  
統軍盪平之獻捷 上賜金帶陞巡撫雲南僉都御  
史未幾卒

馮珪

馮珪字廷玉安肅人永樂中以璧經領鄉薦初授南  
京理問折獄詳明庶民允賴陞行太僕寺丞禁革奸  
弊馬大蕃息巡撫交薦復陞太僕卿初心益勵抵官  
二年致仕行李瀟然非公事不見邑宰

寇深

寇深字文淵唐縣人永樂中爲郡庠生上言時務

朝廷奇其人召入冑監時山東要路軍需錢穀有弊  
政遣中貴人陳保生往廉之求國子生精敏者同事  
得深甚喜宣德初擢刑部主事以勤能稱尋陞員外  
郎丁父憂服闋復任盡心刑獄凡疑獄人不能辯者  
必屬之正統甲子用執政薦陞山西按察司副使時  
天久不雨 朝廷念刑獄有冤抑者特委錄山西諸  
郡大辟因察其情有矜疑者五十餘人悉奏釋之又  
上邊務數十事多見采納丙寅四川松藩夷不靖守  
臣請出師勦之 朝廷念撫治者非其人乃命廷臣  
推有風力者僉謂深可卽日陞右僉都御史以往遂

破賊寨擒其渠魁送京師諸番讐伏獻盔甲刀劍三千童男三十七人駿馬四百餘匹繼後入貢不絕於是撫恤士卒相地要害築關堡城池六十處道路險峻者咸削平之以便儲運番夷酋長或率其黨來見乃宣布朝廷威德且諭以享福之道莫不感化地方底寧朝廷嘉其能進左副都御史加食二品祿綵幣帛金之賚甚重因母老上章乞終養朝廷優詔慰留之景泰辛未召還特加獎勞番人乞留者十有七奏不從未踰月奉命提督遼東軍務假便宜之權以往至遼威名大振積糧練兵畫防禦守備之計

中外守臣咸敬畏之海賊李福挾妖術以惑山東之民聚至萬人身親率數百騎直抵海州遣都指揮周英授以成算捕之遂獲千餘人詰其造亂之由得首惡二十餘人械至京師餘皆釋之景泰甲戌北虜入境深議巡邊之策因其勢便斬首賊七十餘級獲馬六百餘匹在邊歲久思親益切或與同事者言及母老輒流涕終日不食累上章乞歸不允丙子得還京議邊事時母年九十有四已感風疾曰吾得見吾兒卽瞑目矣深悲泣懇求歸省至家母一視而逝哀毀踰禮 朝廷起復任乞終制不允天順改元 英宗

復位乃許終制二年臺長缺人復起視事進左都御史深嚴厲忤急百僚畏憚上深嘉之寵賚優厚常召訪政務但呼老寇而不名性至孝雖居顯仕惟以不得養親爲歎諳於世故聽獄能斷人服其明天順辛巳見逆賊曹欽父子兄弟恣意妄爲率御史劾之欽等反謀首害之賊誅滅特贈少保謚莊愍

王驥

王驥字尚德東鹿縣人自幼警敏年十三爲諸生卽有遠志登永樂丙戌進士授兵科給事中尋出使山西見徐溝民困奏免鹽池虧課二十餘萬時應天府



缺承務急且冗委署之立辦復署行在都察院事持  
正不撓陞山西按察司副使洪熙元年 仁廟素知  
其才召爲順天府尹敏決不滯畿甸大治特賜誥褒  
之 宣廟卽位之明年陞行在兵部右侍郎時慮南  
京根本重地真定州畿內要衝秦蜀二王府護衛兵  
多兩遣分調屯駐皆處之得宜宣德乙卯進行在兵  
部尚書先是虜酋阿台朶兒只伯之軍猖獗塞下  
英宗卽位改元卽遣視師許以便宜行事至見沿邊  
城堡不堅將無紀律歎曰邊防如此宜乎寇至翼日  
大集官兵問曰往年出兵遇虜於魚兒海首先退縮

者爲誰咸曰都指揮安敬卽命左右引出斬之一軍  
爲之股慄又誓於衆曰自今遇敵有不前者罪如之  
號令一新兵威大振旣而虜首把禿孛羅入莊浪卽  
遣都指揮魏榮授以方略率兵勦之遂擒其部落以  
還虜始知懼遁走及閱甘涼軍冗冒者汰其三之一  
八月還京 上親慰勞之未幾虜聞驥還復入寇  
上復勅往至則遣大將蔣貴率精騎數千出境且戒  
曰遇敵不捷無復相見也再遣偏將趙安率兵繼之  
與太監曾安都督任禮分兵爲殿遂擒阿台俘殺醜  
類幾盡邊境底寧捷聞 上遣人齎金幣獎勞加兼

大理寺卿明年還京先是雲南麓川宣慰使思任發  
叛累征不利大學士楊士奇等議遠夷不足較只爲  
耕守計而驥獨主於用兵辛酉春復命蔣貴率諸道  
兵往討之仍命驥總督軍務賜以明鎧雕弓蟒龍緋  
袍以壯其行比至聞賊在太候州卽遣都指揮馬讓  
授成算以往斬首數百級餘賊遁去是歲冬分道並  
進會兵上江以火攻之因風縱火斬獲無算盪平其  
巢寨捷聞勅獎勞召北還時蠻賊郎羅造釁於維  
摩州乃遣指揮萬誠率土兵討之賊潰散郎羅逃之  
安南復傳檄諭之邊人遂函其首來獻廣南富州土

官儂郎與沈政讐殺十餘年乃宣諭 朝廷恩威兩  
雙頓釋至京 上親宴於奉天門百僚以次陪宴論  
功封靖遠伯食祿一千二百石特賜誥券追封三代  
未幾思任發竄入緬甸謀復叛驥復總諸軍至金齒  
遣人促緬甸送思任發至軍前緬人佯諾不遣驥至  
騰衝分爲五營與蔣貴及都督沐昂分督以進木邦  
宣慰使統兵萬餘駐於蠻江潯驥責以忠義賞以牛  
酒遂感悅而退緬人擁衆大至密令貴率兵匝江而  
下焚其舟數百艘大戰一晝夜賊潰首惡又遁去不  
可得捷聞召班師加祿三百石壬戌秋北虜近邊

上復命出巡仍許便宜行事乃自寧夏抵甘肅凡寨堡烽堠悉增修之仍授邊將以破賊及練兵方略事竣還京麓川遺孽思機發思卜發復據孟養以叛戊辰春上復命總督諸軍率兵往討之至金沙江賊於西岸立柵以拒乃伐竹爲梁麾兵悉渡一鼓破之又於鬼哭山顛立柵驥與偏將親矢石往拔之二孽死於亂兵南服遂寧景泰初都督官聚征湖廣苗賊失利乃命佩平蠻將軍印代總其兵遂大破苗賊獲其酋長檻送京師餘黨悉平振旅而還復增祿一百石子孫世襲總督守備南京壬申秋以老乞閒還京

丁丑 景帝有疾同石亨等奪門奉 英宗復位仍  
兼兵部尚書理部事再閱月解職禮遇甚厚驥天資  
通敏遇事敢爲每陳利害休戚疏辭懇切讀者悚然  
與人交不立崖岸循循和易雖位兼將相曾無驕貴  
之意體貌清臞風儀峻整善談論見之懍然天順四  
年疾亟家人皆惶懼驥曰古人以死爲歸何至是耶  
對敬人大理卿龔永吉叙閒闊神思如常客甫出門  
就席而逝年八十有三追封靖遠侯謚忠毅

何 翕

何翕安州人由監生永樂中任武陟縣令敦行教化

寬仁愛人導民孝弟力田捐俸助婚喪不能舉者考  
滿民走闕留之銓曹嘉其賢加通判俸仍管縣事蒞  
政十八年以賢能第一擢監察御史振揚風紀辯理  
寃獄甚多及謝政表正風俗施地建學鄉人賢之

王瑾

王瑾安肅人由舉人宣德中分教潞城陞咸陽知縣  
興學勸農鋤強植善凡利於民者罔不殫厥心力爲  
之丁外艱歸民思不置陳於上特旨奪情起復尋  
以秩滿銓除新尹王瑀來代民猶不忍釋復陳於  
上特旨進六品秩仍留咸陽新尹改三原縣後二載

陞延安知府凡所以惠其軍民者一如咸陽九載秩滿撫按藩臬各具軍民請留狀交章於上允之進三品秩陞河南右布政使忽疾不起士夫軍民如喪考妣爭繪像祀之咸陽至今春秋廟祀

宋傑

宋傑字廷英定興縣人宣德癸卯鄉舉登庚戌進士歷任兵科給事中光祿寺少卿陝西布政司左布政使都察院左副都御史叅贊甘肅軍務天順改元爲權幸所擠左遷山東叅政移湖廣左叅未幾仍進方伯成化改元進職右都巡撫蘇松尋致仕先後共歷



仕途四十年傑性和厚質實而量有容居官能行所無事人以鎮靜稱之

孟鑑

孟鑑博野人宣德壬子魁鄉薦明年登進士擢吏科給事中嘗持節封王饋遺一無所受陞都給事中不數月拜戶部左侍郎時廣東海寇黃蕭養作亂攻沒州縣進圍廣州甚急朝廷已出師往征復命鑑叅總戎務鑑至去城百里左右請勁兵爲衛鑑惟以五騎從之而入時州城四閉已兩月矣薪穀騰貴人心洶洶鑑卽下令開門聽民出入賊詭乞降鑑知其計

募戰士繕甲兵以待之賊果率衆圍城鑑出精銳指授方略刻期擊賊遂獲黃蕭養傳首京師餘黨悉平景泰朝召還措置山西邊儲總理湖廣軍餉所至有功謝政年餘召起南京工部左侍郎抵任數月卒

張鵬

張鵬字騰霄號拙菴世爲保定涑水人父渠官兵部職方主事鵬幼已負卓異不與里中羣兒嬉年十四失所怙繼失所恃雖處煢疚而向學則勤勵不懈及入邑庠才思日充正統丁卯領順天鄉薦景泰辛未登進士授山西道監察御史立朝謇諤有才名凡百

施爲務持大體略苛細常條奏時事關民之休戚者  
十而人服其切直朝廷嘉納悉下有司施行之尋按  
治隆慶等處己亥監南和伯軍之湖廣丙子清理京  
畿馬政在在卓振風裁賢聲益著天順丁丑武臣石  
亨恃寵作威福人莫敢犯鵬奮不顧身率同列極詆  
其罪亨憾之竟被誣構謫戍遼東鐵嶺衛尋改廣西  
南丹衛後亨事敗人服其眊見幾先 憲宗卽位宥  
還乙酉召復舊官明年超擢福建按察使戊子擢巡  
撫廣西左僉都御史鵬常謫居其地備諳民夷土俗  
凡政令之出甚合時宜而邊境用寧己丑言官劾中

外大臣之不職者誤及鵬 上知其忠獨留巡撫如  
故尋改理南京都察院事是非予奪一以至公而臺  
綱振肅辛卯春復改都察院總督漕運兼巡撫淮揚  
等處明年盜發境內奉 勅巡視廬鳳等府惟以恩  
信爲治輯捕有方踰年盜息仍還南京理院事隨擢  
右副都御史巡撫寧夏丁酉召爲兵部右侍郎尋轉  
左壬寅特拜尚書甲辰進階資政大夫加太子少保  
自是多疾常在告累乞致仕不獲允後復請不已  
上察其意堅俾馳驛以還命有司月給米二石歲給  
役夫四人陞辭復賜鈔二千緡皆異數也 孝宗卽

位詔進資德大夫正治上卿居家優游自適凡七年而終享年七十有二謚懿簡鵬剛直貞介夷險一致凡六爲臺憲歷內地邊方者八所至必感激自效竭盡心力爲本兵時遼東守城請開邊雲南孟密思乞受官修貢皆奏止之武臣有乞金齒叅將者執不可其臨政簡約每以生事喜功爲戒當歲饑四方奏多盜賊陝西河南諸處尤甚鵬報言此輩特逼於饑不得已而然耳惟罪首惡者一二餘悉宥之則其黨自散矣各道奉行未幾果無事其居官處事益如此鵬爲人惻朴無華雖居顯要自奉如寒士資性樂易莊

重不立崖岸不輕笑語其侃侃若不可近然待人直誠故多樂爲之用云

劉慶

劉慶字本善保定新城人祖子欽父普安永樂間隨王師征討有功朝廷報之以官不受歎曰吾世業儒以詩書起家安事兜鍪爲也遂棄歸田里教慶讀書慶沉毅淵默而性少許可不肯脂韋世俗少游學河間旣成瀛鄭之士歛手避莫敢當其鋒遂舉正統丁卯鄉薦卒業成均謁選授河南道監察御史持斧行郡國威聲四震成化改元兩廣弗靖廷議須命文武

兼備御史往大司馬白公主遂以慶名奏請以行比  
至廣賊鋒甚銳狶突豕奔衆嬰城自守益自元戎以  
至偏裨莫知計所從出慶爲之出奇決勝進三軍而  
諭之勗以溫言責以大義倡勇敢禁擄掠民間一絲  
一粟不敢耽臨敵雖矢石交下亦不敢輕有動移慶  
曰士用命可以戰矣翌日元戎整兵而出號令嚴肅  
部伍齊整器械鮮明賊望風而遁兩旬間大功遂成  
慶之力居多焉班師之日行李蕭然 朝廷嘉之陞  
大理寺右寺丞賚予益厚丙申陞右少卿成化己亥  
卒年五十有八

賈俊

賈俊字廷傑束鹿人景泰庚午舉人天順己卯就國學被簡爲山西道監察御史比五出巡所至獎廉黜貪鋤梗植弱共稱爲能歷按察副使督修德王府工輒就緒遷左僉都御史巡撫寧夏蓋異選也俊至則持憲度嚴軍法麾指任使惟所當數年虜不敢犯成化癸卯召入爲工部右侍郎飭材訓藝動必信度乙巳河南饑勅俊往視悉力賑貸多所全活丁未遷左侍郎未幾遷尚書弘治辛亥勅修太廟夾室成加太子少保久之有足疾四上疏乞休歸三年卒俊



歷事三朝始終完名巡撫六年不携家眷敝靴澣服  
至今猶有傳頌之者宦官汪直權傾中外六卿咸屈  
膝下之俊獨奮然與之抗禮直雖改容起敬然百計  
傾陷竟莫能動 孝廟欲建水亭俊謂財用匱乏不  
宜興此無益之工疏凡三上 上雖寢其事而中不  
懌會太監李廣方爲 上理髮前跪曰罷此老可也  
上怒曰工書爲朕省費渠安敢出此言以靴尖踢  
其一齒俊聞之累上疏乞休 上再出溫旨慰留之  
俊之直節勁氣受知 孝廟如此

田 昭

田昭字明德清苑人由景泰癸酉科舉人歷任福建鹽運司副使天性廉潔一毫不苟取致仕還空然一囊行城市中不車馬守祖產百畝餘以勤儉治家儼若農夫教二子長芝次蘭芝舉鄉薦蘭登進士鄉人以爲德厚流光云

呂 雯

呂雯字天章保定府安州人舉景泰癸酉鄉薦試禮部輒弗利成化初選爲監察御史數直諫有聲會出師征東夷從左都御史李公秉往紀功還擢南京通政司右叅議未幾以內艱去十三年服闋改南京光

祿寺少卿十五年召入爲太僕寺少卿馬政修舉十九年薦爲都察院右僉都御史巡撫延綏有虜警衆議未決雯曰虜旣深入宜堅壁待之彼無所獲必困而歸歸則以勁兵邀其後可以得志果如其言事聞有白金文綺之賚旣乃築邊牆三百餘里虜不得近人恃以安山陝饑榆林獨熟民流集者甚衆雯慮其生變縱令出境必饑而死欲招集無米可恃後設處多方所活不可勝計邊人至今能道之久之徼外益無事二十二年有兵部右侍郎之擢弘治三年遷左侍郎時天下無警曹務外無以自見屢有建白皆下

有司比持節封宗藩清稽武誥名籍皆其餘事也其  
爲人樂易可親交朋友待鄉黨俱從厚遇事善裁決  
論象緯有驗祿命亦多奇中弘治甲寅卒年六十六

楊宣

楊宣新城人登景泰甲戌科進士任河南道御史歷  
禮部左侍郎掌鴻臚寺事立朝有救劉千斤餘黨誣  
陷疏劾曹吉祥石亨橫逆疏上僉嘉之至今朝野  
赫赫有聲

侯瓚

侯瓚雄縣人景泰甲戌進士授戶部主事奉命視

湖廣饑奏免稅糧八十餘萬石民困以蘇歷員外郎  
出守鳳翔下車卽賑濟流移全活者衆九載陞山西  
叅政進光祿卿轉右僉都御史巡撫甘肅時有哈密  
之變瓚召赤斤蒙古二衛授以方略克復八城俘馘  
千五百餘不自有其功兵部奏聞降 璽書嘉諭及  
戰勝邊虜兩賜金幣繼陞兵部右侍郎改南京禮部  
轉戶部左侍郎遷南京工部尚書轉兵部叅贊機務  
數懇致仕進階榮祿大夫卒子觀登進士官至戶部  
尚書

田景暘

田景暘字時中保定高陽人登景泰甲戌進士授山西道監察御史陞大理寺丞累陞左右少卿進本寺卿成化乙巳致仕歸景暘爲人峭直精敏有幹局爲御史甚著風裁按治所至貪墨多斂迹推掌三法司事彈劾無所避在大理持法不撓詳讞平允後引疾去時年五十九在林下餘二十年吟咏自適絕世故進階禮部尚書正德元年卒謚文懿

吳 麟

吳麟清苑人景泰間領鄉薦由中書陞德府左長史爲人敦孝友樂施予父嘗罹疾嘗糞以驗安危居官

所得俸祿悉惠宗族嘗值荒歛族人不能自給者罄家貲易粟以濟之以故鄉里婦人女子亦知其爲吳中書也

### 韓文

韓文字貫道新城人天順丁丑進士授行人擢給事中使琉球嚴禮度宣上意辭所餽物遷戶部郎中會畿內山東水上疏陳便宜十事尋擢陝西叅議岷番作亂出奇兵勦之轉叅政進右布政權茶易米以備儲蓄得二十餘萬陞右副都御史巡撫寧夏尤留心邊事有司奉令捕豹上疏請止之已而乞休致命給

驛歸弘治十一年卒賜祭葬如例文器宇宏闊以平易爲政未嘗肆苛猛立聲譽時人稱之

王道

王道蠡縣人天順丁丑進士初授行人爲戶部福建司員外郎尋陞郎中時荆襄流民倡亂道議郡縣其地悉入編戶帖然順治陞山東右叅議督理廣寧邊儲陞叅政歷都察院右副都御史撫治鄖陽時流民野王剛復亂悉勦捕之又劾宗室擾民及按荆藩諸不法時以爲允宜

黃縉



黃縉安州人天順丁丑進士授戶科給事中多所建  
明爲人性狷介毫髮不苟人有餽謁者嚴拒不受擢  
江西叅政歸家隱鄉村布衣蔬食如儒生鄉人至今  
稱賢

吳 櫓

吳櫓博野人登天順甲申進士拜禮科給事中遇事  
敢言擢四川叅議山西叅政陝西布政時關中饑條  
陳救荒數策皆見採納巡撫湖廣德威並著總督南  
京糧儲以疾辭得致仕櫓爲人孝謹嘗捐貲修學置  
造祭器創建石橋以濟往來修治道路以便行人市

藥以濟時疫

馮貫

馮貫字大用保定蠡吾人也曾祖守道元西臺御史  
貫少起田畝年十八始知自奮於學正統己巳之變  
士民驚潰失業貫誦讀不廢及領鄉薦入國學貧無  
膏燭夜每挾冊隨月光以讀晦則燎薪續明其勤苦  
如此登天順甲申進士授監察御史嘗出巡邊關按  
州縣搜吏弊索民隱貪廉才頑多見褒黜成化中上  
疏言時事曰慎爵賞卹窮民處流移修兵政廣儲蓄  
禁盜賊平刑獄息邊患節冗費重憲職數事上嘉

納之及掌三法司事治山西妖民及劾兵部大臣不法事聞者肅然九年進大理寺右寺丞轉左寺丞進少卿不數年遂擢都察院右副都御史又改大理寺卿法律精明持心仁恕嘗曰大理平天下獄獄之不平咎在誰執故當奏讞必反覆訊鞫無憾而後已每廷議叅酌得宜其言載在條例有司至今遵行之嘗應詔舉所知衆稱得人弘治六年拜南京工部尚書九年以疾乞致仕詔可且命馳驛以歸抵家一月而卒壽六十有四貫魁岸美髯爲人詳審沉靜而有謀謨度量汪如莫窺其際在大理嘗承詔會同三法司

錄囚有餼羊上尊之賜會勘肅府汾川王承奉及廷  
試爲讀卷官皆有寶鏐之賜及卒 上遣官諭祭治  
其喪葬

李鳴鳳

李鳴鳳定興人天順甲申進士授刑部主事所治皆  
京兆獄訟間遇權倖家不法必嚴鞫之務俾服辜雖  
動以危言弗恤後知太原府一富室初育從子爲嗣  
者旣壯不檢逐之因積憾潛殺其父而遁去有司冤  
及死者之妾繫獄四五年勿白鳳多方密悉其故卽  
擒其從子一訊而妾遂得免人稱神明

曹 臻

曹臻安州人登天順甲申進士授監察御史按山東先是濟寧郡縣河流淤塞民饑爲盜臻至疏水下洩民得稼穡盜聞風解去擢湖廣按察司副使鄖陽巨賊據險叛亂臻奏立鄖陽府縣卒于官

王宗彝

王宗彝字表倫束鹿人初名倫文之子也嘗鄉試不第景皇帝以文故欽賜舉人天順初文被法宗彝亦謫戍事白復領鄉薦以成化丙戌進士授戶部主事尋用薦遷郎中督理遼東軍餉後討建州夷以督

餉有勞陞大僕少卿久之擢右僉都御史巡撫廣東  
時建州以方受討疑懼不貢又遮掠朝鮮貢使宗彝  
謂用兵費且不貲請寬之許令修貢癸卯坐累左遷  
四川叅議會番夷毀朽茂餉路宗彝出彼不意窘以  
兵俾修復之累遷右副都御史巡撫陝西入爲兵部  
右侍郎閱潮河川等路兵馬城池尋轉左庚申虜寇  
大同經略居庸等處右都御史虜犯遼東以宗彝提  
督軍務亡何擢南京禮部尚書正德丁卯逆瑾用事  
乃罷歸瑾敗言官累薦不起年及八旬耳目聰明手  
不釋卷乙酉卒賜祭葬如例謚安簡宗彝儀幹修癯

端謹厚重所至靡不盡力然不事表暴故無赫赫之名

劉瑀

劉瑀蠡縣人成化丙戌進士初授北臺御史出按陝西風岸峻整不少假借監鄉試尤號得人尋陞蘇州知府以簡靜鎮驕奢風俗爲之一變擢山西叅政歲饑盜起瑀乃賑恤嚴緝民賴以安轉福建山西左右布政陞都察院都御史督南京糧儲凡巨猾積弊釐革殆盡復與同事者嚴體統之辨自是人不相安矣弘治五年致仕

朱英

朱英博野人成化甲午鄉貢辛丑進士除大理寺評事陞寺副時山西疑獄歲久不決奉命往鞫始得平允轉寺正持法公直強貴敬憚呼爲朱蝎子出知鳳翔襄陵王雅敬重之

張貫

張貫蠡縣人成化乙未進士初授河南知縣慈祥樂易不爲苛刻擢南京湖廣道御史轉陝西按察司僉事整飭邊務邊境晏然弘治戊午哈密犯順承命出師平之賜彩幣陞四川副使尋陞貴州按察使以持



法忤逆瑾謫官叅議復進右副都御史巡撫遼東銳  
意邊務謹烽火明斥堠凡兵馬芻粟城臺墩堡卒有  
成效賜璽書加二品俸蟒衣三襲卒于官

### 侯觀

侯觀字士賓其先山東諸城人永樂初曾祖文質以  
間右徙實畿內遂占籍雄縣父璣官南京兵部尚書  
觀以成化十三年舉鄉薦明年第進士試政戶部又  
明年授河南登封令勤恤民隱薈剔宿弊邑有豪猾  
武斷鄉曲父子濟惡人以虎目之觀廉得其情置之  
法積害頓除十八年大旱繼以瘟疫觀禱於中嶽願

以身贖移時雷電交作大雨如注病者以起歲亦大熟二十年復旱流離餓莩枕籍道途覲發倉賑貸老羸不能支者爲粥食之賴以不死者甚衆部使者交薦之以治行異等徵時父瓚爲兵部侍郎例不得任御史乃授戶部主事弘治二年淮徐大水奉命往問百姓疾苦奏免其租稅有差丁母憂服闋復除舊官九年陞員外郎進郎中十四年行河督漕運令嚴而信領運者皆如期而至尚書周文端公器之薦觀自江西司調補雲南司蓋雲南司屬京府事倍他司故也部中章奏多以委之十八年陞南京太僕寺少卿

既之任念翁年老留京師疏乞終養翁樂之比卒京  
毀益甚正德五年改太常寺少卿提督四夷館尋進  
本寺卿七年陞戶部右侍郎總督京通倉場明年理  
部事又明年虜入宣府大同二邊十一年盜起畿內  
皆命觀兼左僉都御史理軍餉有白金文綺之賜  
轉左侍郎武宗北巡應州之役復兼憲職隨軍給  
餉班師賜飛魚衣三廕一子世官十四年陞尚書仍  
總倉場疏請裁冗食停工役以實京儲下廷臣集議  
咸是觀言謂宜卽令臺諫查革不報世宗御極乞  
休致仕溫旨留之四上乃得請令有司給廩月三石

與隸歲四人觀感泣謂其子孫曰 主上之恩厚矣  
吾無以爲報汝曹勉之旣退杜門謝客終日端坐閱  
書史聞親友至則飲酒數行與與如也久之歸雄縣  
得疾不起贈太子少保賜祭葬

王寅

王寅字敬夫容城縣人成化辛丑進士授大理寺右  
評事進寺副弘治壬子遷福建按察司僉事辛酉遷  
陝西按察副使正德丁卯遷廣西按察使己巳陞四  
川右布政使 召拜太僕寺卿庚午擢工部右侍郎  
辛未改戶部奔父喪歸守制服除甲戌改刑部到官

幾一月而病再疏乞致不允疏三上 詔許歸養疾  
疾愈起用歸兩月而卒壽五十有七初寅爲諸生嘗  
執經從都憲楊一清遊愛其慤而文動循規則及爲  
評事執法惟謹權利不能奪山西豪右有坐法當死  
者懷白金二千求脫寅怒曰胡爲以是加我將執之  
其人懼走久之陞福建僉事運籌策勦海洋羣寇申  
嚴號令寇畏威遁去海道肅清在陝西分理馬政稽  
牒按籍不遺餘力復墜緒於磨滅之餘還牧地於官  
數萬頃其功居多至其分巡諸道理戎務覈邊情所  
至刮奸剔蠹拒請托制強禦陝之人多能道之韓藩

支庶因姦毒一女子死井中初有司誤坐他人獄且具都憲楊一清廉得其實屬寅治之有緋袍玉帶者造寅所出寶帶一束請曰願救吾兒寅正色拒之竟論如法在廣西二年一方之獄稱平而簡易安靜不失柔遠之體川藩命下會南北邊警告急詔廷舉習知邊務者數人以備用寅在列被徵爲太僕馬政一新爲工部專理易州山厰剝繁折紛得其機要完逋負二十餘萬在戶部卽罹家艱以去在刑部病歸卒于家

人物考卷之五目錄

北直隸保定府二

劉大寧

李儼

李敬

張天衢

劉瓚

傅珪

丁鳳

胡昂

仇惠

韓璫

劉錦

李師儒

張宦

馮顯

崔嵩

韓春

崔岑

馮蘭

宋璉

鄭陽

李緯

劉愷

王凱

冉繼志

郭鳳

石宗岱

王堯封

袁宗儒

石麟

邵錫

王德明

賈道

附弟遵

田蘭

鄭紳

王承恩

岳倫



張勅

何思

高燿

孫慎

楊繼盛

劉斯潔

張執中

張時

陳典

鄭洛

許大亨

劉兌

甯化龍

邊靜

張英

補遺

楊寧

楊潭

魏彥昭

王重賢

本朝京省人物考卷之五

北直隸保定府

劉大寧

劉大寧字汝功完縣人倜儻有大志淳朴如愚恂恂雅飭自幼天資穎異讀書雖寒暑不倦遂得博極羣書淹貫經史尤邃太極圖說以理學名成化十九年領鄉薦授隴西知縣改廣陵復調安陸皆有政聲

李儼

李儼高陽人由進士成化間授南京戶部主事歷陞山西叅議治邊餉先是奸豪多所乾沒儼盡法繩之

不少假借顧爲當路者所扼遂致其事歸儼孝友性成撫從子無異已出大學士新都楊廷和表其墓畧云公不能容人之私而有容人之量人能屈其所可爲而不能屈其所不可爲聞者以爲知言

李敬

李敬高陽人由進士授監察御史成化間北京大饑敬監糴太倉附闔戚者多陰佔射利敬率按法繩之出按陝西振揚風紀布按官多啣之陰諷他御史劾敬齎憤而卒

張天衢

張天衢高陽人由進士成化間授封丘令有商鬻布  
置縣前石獅上爲盜所竊踪跡無驗天衢取石獅杖  
之觀者傾縣乃闔門視衣果得布號時人號爲斷石  
公有殺人者匿其屍誣逮甚衆十年不解天衢訊之  
有羊角風興於前隨至其處有伏屍因緝得其人誣  
者頓釋人又號爲斷鬼公當道交薦授監察御史

劉 瓚

劉瓚清苑人成化間知蒲臺廉明沉毅有治劇才建  
廟學開荒蕪勸耕織民安其業旁邑民將謀盜境內  
未行輒捕之人以爲神明後擢監察御史尋調知襄

垣縣時歲饑勸富民出粟以賑之又令採橡實教以  
煮食之法民賴以甦後復建社倉貯粟四萬餘以備  
荒歉居五載政通民和及陞知壽州百姓攀轅泣送  
如失慈母

傳珪

傳珪字邦瑞清苑縣人成化丙午舉順天鄉試明年  
舉進士選翰林院庶吉士弘治二年授編修甫三月  
丁憂服滿復舊九年禮部會試充同考官尋爲經筵  
展書十三年兼司經局校書纂修大明會典書成  
陞左春坊左中允兼編修賜以金幣十八年復同

考會試是年陞左春坊左諭德兼侍讀經筵講書有金帶緋衣之賜正德元年纂修孝宗實錄清理軍職帖黃明年主考應天鄉試又明年主考武舉咸稱得人四年教習庶吉士進日講官是歲實錄成例當陞職時逆瑾欲摧抑之乃以大明會典字訛珪嘗預修詔奪其官降修撰尋以實錄恩陞中允未幾陞侍讀學士五年陞學士主考順天鄉試頃之陞吏部右侍郎尋轉左時太宰楊一清外號秉直陰樹私黨又通餽遺珪數其不公一清不堪於七年越次陞禮部尚書實遠之也時諸司當瑾煽虐之餘事多因

循履遺廉澤值見信法奉事無巨細一毫  
程法杜絕請託人不敢干以私條陳十餘事皆關國  
家之計又以四方災異疊見凡有至者皆具疏以聞  
時內閣李東陽壻爲儀曹郎中恣橫不法珪乃按其  
廢法笞責之教坊禮部屬也優人臧賢輩憑寵賜  
請改牙牌製如羣僚又以其舊篆狹小詭奏篆文模  
糊請易鑄珪令但倣舊式鑄與之諸教坊官乃日騰  
謗欲以中傷而卒不可得上方好佛自名大慶法  
王番僧奏討田百頃爲大慶法王下院珪劾僧曰法  
王何爲者乃與至尊並號大不道當誅詔不問



其妄求亦止又西番僧法王佛子封號皆關禮部珪  
執奏以爲狄教不足崇國制不可廢士論翕然稱  
之盜劉六擾中國勢炎熾大監陸閭立監鎗名謀出  
統軍命多官議可否衆依違不斷珪怒而言今兵  
老民疲直以多冒功者失志賊在肺腑孔棘民譁然  
思亂禍旦夕及宗社吾儕死不償責諸公尚唯唯  
將何待乎明日竟遣監鎗者傳旨令致仕卽速裝  
就道旣歸清苑杜門謝客跡不至郡闢園城西蒔花  
植木日與親舊飲酒賦詩爲樂絕口不談朝政不通  
書朝貴中有佳山水趣携親友往遊浹旬而返峻絕

幽邃人所不至之地皆留題焉十年四月以疾卒年五十有七爲人厚重朴直沉毅端方耻浮薄寡嗜好內剛外和與人言侃侃無所隱伏自檢甚嚴於繩墨不失尺寸居閑渾然遇事則精核明審人不敢欺主應天試事時簾外官有權要囑之行私者送廩餼時令一私人至簾內欲有所請白卽叱出痛笞之曰此豈汝所至之地其人竟不敢言說者謂當時一容其人啟口則行私者得以藉詞矣在禮部尤稱執法一時士夫倚以爲重爲文平正不事剜刻有北潭集八卷藏於家卒之日棺槨衣歛之具皆自處分書籍詞

翰之類皆封以付諸弟且戒死後勿乞 恩祭葬勿  
求墓志銘勿作佛事旣卒撫巡官以聞 上命賜葬  
祭珪在翰林時無事表見及柄用則剛大之氣忠貞  
之節經濟之才鎮定之力卓然不羣而其處進退死  
生之間尤爲俊偉求之古人蓋無愧云

### 丁 鳳

丁鳳字應韶蠡縣人成化丁未進士初授戶部主事  
監督京通倉臨清糧斛剗削宿弊改鴻臚寺丞累選  
少卿南京鴻臚寺卿應天府尹活繫囚百數轉左副  
都御史總督南京糧儲奏革冗食軍匠五六千人爲

通政使兵部右侍郎正德丙子冬虜入宣府兼都察院左都御史提督軍務六月虜寇大同鳳同總兵劉暉帥師討平七月復寇宣府鳳調兵却之 朝廷嘉其功廕錦衣衛世襲百戶十三年回籍

胡 昂

胡昂定興人進士成化十七年令如臯性簡朴廉靜政嚴明綽有聲鄰邑民訟未決者每質成焉十八年大饑昂面白當道截貸蘇松運糧賑濟全活甚衆民至今德之累官按察副使

仇 惠

仇惠新安人成化丙午鄉試壬戌進士初任知縣更畏民懷當道薦擢御史巡按山西赫赫有聲所作教民榜勸善勸農文曲盡閭閻情狀時值宦監傾害左遷滁州判官後知泗州俱得民心陞山西按察司僉事卒於官

### 韓 璚

韓璚高陽人弘治間以進士授戶部主事屢督運餉出納稱平歷陞山東僉事分巡遼東時妖人李真等作亂璚捕誅無遺類擢陝西按察副使避謗歸尋起四川按察副使整飭威茂兵備威茂寓萬山中由疊

溪達松藩五寨蠻夷據山絕嶮運道弗通璫調集兵士攀木緣崖夜襲其寨且斬且焚五寨悉平一方安堵陞湖廣叅政致仕

劉錦

劉錦蠡縣人由舉人弘治間授陝西華州知州屬商山猛虎爲患錦授民以捕擒之法屢獲虎民賴以安山東盜起將逼潼關錦以武略巡守盜聞之匹馬無敢近關後知湖廣武崗州時戍卒強悍素爲民厲見錦威令咸歛服興利革弊士民咸畏敬之

李師儒

李師儒高陽人以進士弘治間授宗藩長史不就罷  
歸起遷四川布政司照磨歷仁和知縣守汝裕二州  
時瑾黨橫行郡邑官皆望風下拜師儒長揖而已分  
巡臨清大賈汪信闔門爲兩傭所劫而氓其迹師儒  
曰安有禍及主翁而兩傭獨存之理一詰得實境內  
稱神陞山西叅政

張宣

張宣完縣人弘治中以進士授南京戶科給事中彈  
劾不避權勢人稱其有骨鯁風陞四川叅議以忤逆  
瑾落職瑾誅復官終陝西行太僕卿所在有冰蘖聲

馮顯

馮顯字德彰安肅人由進士弘治間授濟南府推官  
獄獄明恕賢聲四達復除廬州入爲監察御史查盤  
甘肅軍餉釐革宿弊巡按河南百務肅清時逆瑾諷  
顯誣冢宰許進顯執不從曰寧忤權悴不枉忠良瑾  
怒繫還至途瑾被誅得免陞山東副使兵備徐州改  
九江兵備法令大振盜賊屏息

崔嵩

崔嵩霖之子始建都司學初第進士任慈谿縣知縣  
有惠政未逾年而瑞麥瑞穀兩見於夏秋人以爲德



政所感陞廬州同知至廬脩郡志築運河有文學濟  
幹之稱官至按察僉事

韓 春

韓春蠡縣人弘治辛丑進士授睢寧知縣時大旱春  
自責請禱夜夢神柳義送雨果大雨三日劾平江伯  
擾民罷之擢北臺御史痛革時弊督修 皇陵劾宦  
官李興條陳六事 朝廷賜衣一襲銀五十兩尋陞  
山東按察司副使逆瑾用事以剛罹禍遂歸進階亞  
中大夫

崔 岑

崔岑蠡縣人領弘治癸卯鄉試性行剛毅規模整肅閱極羣書不專師授父母繼沒廬舍於墓側三年遠近士咸依之兄沒撫其遺女撫育禮嫁如已出知榆次六年政化大行後人思之勒於碑述治績彙爲錄傳焉

馮 蘭

馮蘭蠡縣人弘治癸丑進士授吏部稽勲司主事歷陞文選司郎中守法奉公人不敢干以私陞南通政轉北通政陞光祿寺卿工部左侍郎總理易州山廠致仕卒蘭以清慎公勤受 特恩加蟒衣三襲嘉靖

改元贈通議大夫

宋 璉

宋璉字汝器清苑人弘治乙卯舉人初任樂陵教諭兩典文衡皆稱得人擢御史巡視中城鞫金牌鐵劄之獄名重當時奉 特旨經略三邊時逆瑾專政璉上疏劾其黨以邊事尅內帑金鉅萬請誅瑾而後奸黨可治瑾閱奏深銜之以方謀逆不及加害疏上閱日瑾敗 康陵稱真御史云巡按關中墨吏皆望風去釋被瑾誣者幾百人因諫遣歸 肅皇卽位起湖廣僉事調榆林却餘金萬計給軍士榆林人甚戴之

陞西寧副使番漢皆安乞休加叅政致仕尋卒奉  
詔入鄉賢仍建家廟給祀丁

鄭陽

鄭陽字宗乾安肅人聰慧過人少從宦學於浙弘治  
丙辰登進士授夏津知縣躬節儉振頽敝刑清政舉  
擢監察御史巡按河南瑾賊納賂奪民田而歸之宗  
藩陽執法拒之遂繫獄左遷主簿尋知潛山縣瑾伏  
誅遷四川僉事陞浙江副使湖廣按察使所至克舉  
憲職遷山西右布政使尋轉左陞巡撫寧夏及陝西  
風紀肅然武宗西巡命督餉於邊時公私匱乏人

皆危之陽穀然區畫事濟而人不擾 武宗悅之有  
蟒衣金環帶之賜值段州盜起猖獗陽督官兵討平  
之奏績於 朝詔贈二世如官尋致仕

李 緯

李緯字汝靜唐縣人由進士弘治間授監察御史孤  
忠危言有氣節居官不滿歲上諫疏幾百 孝廟愛  
其直後以忤逆瑾謫揚州推官卒以疏稿殉葬

劉 愷

劉愷新安人由進士弘治間任刑部主事才辨明敏  
無留獄歷鴻臚寺卿授漕運副都御史值山東盜起

漕運阻塞愷陳便宜十事徵調兵馬屯拒要害禁築堤牆設墩鋪以便防守河決黃陵人力不能爲愷爲文祭告河復故道尋陞兵部侍郎禮部尚書 賜蟒衣玉帶

王 凱

王凱蠡縣人由進士授南陵知縣慈祥愷悌務勤儉興士風勵民俗擢御史巡紫荊等關號令嚴明按關陝吏畏民懷陞山西按察副使整飭固原兵備時寵宦盛行凱以剛方自守未嘗有夤競之私後陞山東左叅政未至卒於途

冉繼志

冉繼志蠡縣人弘治間進士授餘杭知縣興學校正風俗禁師巫邑大治擢都察院都事轉本院經歷值逆瑾用事繼志觸之捕下獄遷長子令時歲久不雨民多離散繼志率僚屬齋戒沐浴遍祈諸神遂雨數日陞吉州知州轉順天府治中陝西行苑馬寺少卿以疾歸

郭鳳

郭鳳清苑人由舉人弘治間授湖廣荊州府通判陞山東萊州府同知賑活饑民數萬監兌德州餘銀三

千餘兩悉歸公帑遷戶部員外郎郎中陞四川夔州府知府惟以愛民爲心尤勤課士夔庠始發科焉士民立石頌德鳳命仆之致仕鰥居不治垣屋凡宦游者至多避之不見

石宗岱

石宗岱字岳山清苑人由進士弘治中任歷城縣知縣慈祥愷悌省徭役修廢墜時逆瑾擅權索賄弗與遂罷歸後瑾誅復起漢中府褒城縣令遷衛輝通判致仕鰥居杜門三十餘年官郡縣者未識其面云

王堯封



王堯封字伯圻定興人弘治乙丑進士正德中授襄陽府推官操履廉正讞獄詳明崇重學校酷嗜詩書簡訓生徒數人卒登科甲擢監察御史巡按兩浙籍籍有聲尋陞順天府丞嘉靖二年陞巡撫山東右僉都御史八年改巡視閩浙右副都閑任十一年再起巡撫十三年遷南院歷南工部右侍郎改戶部進右都御史總儲戶部尚書致仕再起南京兵部尚書

### 袁宗儒

袁宗儒字醇夫號靜菴其先爲山西郭縣人徙保定之雄縣宗儒幼而穎特舉動不凡比長篤志力學博

極羣書弘治戊午領順天鄉薦正德戊辰登進士已  
巳授江西道監察御史未幾奉命權茶於陝西綜理  
周密宿弊盡釐癸酉巡按浙江浙俗嫁女費侈或因  
以貧家故多有不舉女者卽嚴爲之禁仍戒諭使節  
省於是女生始免沉溺又多惑風水之說有親死除  
喪而未葬者宗儒諭以人死歸藏之意及人子不忍  
之心其惑遂解於是始無暴露其棺者又貧民不克  
葬者多畀諸水火宗儒乃爲置義塚至今賴焉乙亥  
巡按河南會有河決勞費莫計郡縣苦之宗儒卽定  
規畫慎出納省費巨億民力用甦復上六事於朝深

切利病時趙藩軍校不法爲居民患宗儒以法繩之  
事干宗室因以勢來脅之宗儒卽劾諸輔導官遂致  
歛手并河北亂法鎮守一切按法正之風紀大振宗  
儒爲御史時首值逆瑾擅朝政繼又諸養子濁亂紀  
綱宗儒守正不阿時雅重之丁丑陞大理寺右丞丁  
內艱嘉靖癸未服闋陞本寺右寺丞時議大禮廷臣  
頗有異同宗儒執論不移受杖幾斃尋陞本寺右少  
卿乙酉奉命偕司禮錦衣重臣往襄藩勘事至則據  
典執律研審詳確衆論戇之事竣上特降勅褒獎  
是時有長沙宋知府見忤當道將致大辟上復勅

宗儒往勘至卽湔除枉屈同事者欲誣宋以取媚宗儒曰殺人以媚人吾不爲也事聞上嘉諭之丙戌陞右副都御史巡撫貴州乃力辭資望淺薄不當驟膺三品重任乃改右僉都御史以行時貴州巨盜沙保等攻劫府庫聲勢甚熾宗儒至相機設奇發兵勦捕遂生擒首惡斬獲餘黨捷聞有白金襲衣之賜又劇賊王阿勝等盤據山谷爲二省患宗儒用策殄滅地方遂寧又緬夷貽害遠方欲建長策乃陳九事於朝亦賜俞允戊子以事忤當路回籍別用辛卯復起撫治鄖陽等處地方至鄖陽急先務脩廢典表鄉賢

名宦以勵人心旌孝子節婦以敦風化有故鄆陽通  
判子寇韋者山東人流離不能歸宗儒爲之備禮納  
婦遂成室家其後韋中湖省高第實宗儒成之也未  
幾改巡撫山東時山東盜千百爲羣宗儒至卽克平  
民皆安堵歷城章丘有窪田數多淫瀆積久廢爲沮  
洳乃以田數定夫額令鑿渠以通河導河流以入海  
匝月而就遂成膏腴癸巳以災異自陳致仕宗儒旣  
去任言官交章論薦乙未復起原職管理院事丙申  
陞南京戶部右侍郎戊戌改北尋轉本部左巳亥春  
二月上南巡宗儒扈蹕勤勞旋京浹旬而卒訃聞

上甚哀悼命禮工二部給祭葬焉宗儒歟歷中外三十餘年冰蘖之操有如一曰其居第卑隘自奉甚約雖淑人之冠紳衣帔尚未克備乃割香城里田數畝置義塚曰使吾鄉之貧不能葬者有所歸生平無私書私謁閑居則兀坐靜室不妄接人雖隆寒盛暑手不釋卷嘗曰吾以忠孝事吾君親以勤儉示吾子孫吾事畢矣當隨 駕南狩時民有以子易鵝獻者宗儒知之顧同坐者曰吾輩食人嬰兒也亟命持去贖其子霍文敏常曰文官不要錢惟戶部侍郎袁宗儒而已

石麟

石麟字邦瑞完縣人少負異質善摘文正德戊辰登進士筮仕戶曹出納惟允出守太原却羨餘千金理冤獄五十有古循良風未幾力乞骸骨歸或浪跡竹林寄傲詩社解組三十餘年無一書抵政府年八十四嗜學教子不倦

邵錫

邵錫安州人登正德戊辰進士賦性剛方持身廉介久居諫垣獨持風采諫止邊徼巡幸論頒迎立爵賞爲朝宁倚重勘事甘肅讞獄明允拒却鹽商萬金

疏請大臣賑濟饑民多所全活既拜中丞所屬官吏  
望風解組查革王府奏討莊田澤及小民尤篤於孝  
友歸來杜門課子不干有司生平多著述藏於家

### 王德明

王德明字宗周清苑人由正德戊辰進士歷官巡撫  
山西都御史以直節著稱惠政感召瑞麥疊見敷歷  
中外最効勤勞其宦轍所至俱得士民心歸家後訓  
課子孫科第相望持已接人確然不失尺寸時論賢  
之

### 賈道

附弟運



賈道字會稽東鹿人由進士正德中授山東益都知縣陞戶部主事監河西務稅講明道學爲士林矜式居官峻潔一塵不染卒之日無以爲歛時論高之弟運字會期由進士正德中授南京廣東道監察御史陞陝西慶陽知府歷西寧備兵按察副使其直節懿行有古人風

田蘭

田蘭字世馨清苑人昭之子由進士授山東道御史理刑遭逆瑾索科道千金蘭不從改蒙陰令政不苟察得子民體繼歷官大同知府時以邊卒缺糧久戕

及憲臣蘭踵其後多方處給反側始安以病告歸蔡中丞憫其貧贈之白金還卒於家僅成葬禮門第蕭然

鄭紳

鄭紳字公佩別號敬菴涑水縣人祖友以從兄征進都勻東苗西堡有功授錦衣百戶世襲遂居都城友生表以從征大同有功晉副千戶累指揮僉事紳爲指揮君長子當承廕乃顧雅嗜文墨年十餘受書不釋手指揮君侍朝蚤起紳必先焉歸入戶輒聞讀書聲定省唯時色詞以恭指揮君暨母胡相顧喜曰世

稱讀書人明理道習孝敬吾兒信然大吾門必此兒也令就學於司徒李公李公大奇之一時同學多士鮮或之先焉舉正德丁卯鄉試甲戌成進士乙亥授戶部主事已卯父指揮君卒侍疾執喪務竭其情旣葬廬於墓側百日以母命歸處中門外不入私室不與宴會者三年辛巳補戶部晉員外郎歷遷鴻臚寺左右少卿丙戌陞本寺卿戊子居母喪庚寅起任通政司右通政尋轉左丙申進通政使已亥扈從南狩賜衣帶銀瓢三事已晉工部右侍郎以慈慶慈寧二官工及城垣鼓樓京倉諸工數賜金幣庚子以大工

告成加俸二級及金幣之賜已晉尚書掌通政司事  
俸食一品紳自入官三紀凡九遷不出都城門而累  
績近列晉位上卿紳曰吾其止足時矣遂上疏乞老  
得俞旨是爲歲乙巳紳旣賜休甚適乃故都城居也  
朝大夫舊游及諸後進知紳名數就紳訪政理輿馬  
相屬紳一切謝避之乃於都城之南里許築居號南  
池書院引泉種樹鼓棹中流就訪者又至乃又去都  
城數十里於西山得冷泉之勝築居號北泉書院偕  
朋舊子姓數輩以往間來南池復往探幽尋樂紳之  
詩曰世多君子扶皇極天放閒人養太和都城人誦

焉紳事父母孝事仲父如所生仲父持家政有幹濟  
勞紳念之爲之勒石墓所示不忘與諸兄弟約曰母  
爾我視也母有餘不足論也吾黨今則七人矣其先  
一身耳願世世同堂合食母改於今日約定俸入不  
問所費久之食指以千計勢不得終合紳乃悉捐先  
世遺業讓諸兄弟曰吾固食公家人也烏用此諸兄  
弟感泣弟紋幼紳教之學後領鄉薦仕至濟南府同  
知故所師事李公寢疾獨招紳受遺囑如子紳爲治  
後事如所生同學友病疫且死不能語執紳手授之  
千金竟不語後紳爲卜居定業安處其妻子子長以

所餘金還焉居官門無私謁而紳亦未嘗干人以私  
涑水邇都城邑侯有爲夫役之餽者紳曰吾家世邑  
人也乃今詎可私役邑人謝之居身不喜爲無益之  
勞所在正襟屏息坐竟日因以敬名菴卒之前數日  
手爲書遺親戚朋友備道情故曰吾其長別矣遂卒  
年八十有一

王承恩

王承恩高陽人由進士持志剛方立心廉靜官至工  
部郎中監運同知土房一間薄田數畝而已林隱四  
十年不及公門雖上官賙恤里人餽送悉却不受郡

守吳嶽再造其門未獲一見嘆爲一世高人縣官狀  
其行於憲臺題其門曰一鄉善士

### 岳倫

岳倫字厚夫別號雲石保定人少負奇節以上谷僻  
陋寡見聞挾冊來京從學士許公遊許公奇之嘉靖  
壬午領順天鄉薦丙戌登進士第授行人使汴歲歉  
見饑莩塞途還朝卽上免徵遺賑一疏詞甚激切  
已復兩劾權貴專擅數十事遂落職爲山東齊東縣  
簿稍遷山西曲沃知縣累晉工部主事員外郎郎中  
職所宜舉不遺餘力會朝議羣臣才可往諭安南

者倫名在選中己亥正月也駕幸承天倫首諫止詔  
下禁獄凡六閱月獲賜罷歸上谷平生憤激之抱時  
於聲詩焉發之倫美髯渥顏身長七尺偉然一驍雄  
丈夫謂當遠到而官止郎署年僅五十有一倫性剛  
烈遇事輒發然心極慈仁恤困扶危古人不過俚夫  
有一言當理亦不忍棄嘗欲上書闕下徧歷九邊  
分屯建戍選銳募勇起遼海迄今蜀川修洪公舊業  
以扼潮河之險追王渙遺跡以復興和之城徙朶顏  
諸夷於開平廢壘以大寧地內屬振哈密孱弱之裔  
以制吐藩又欲仿金元故事立瀛海平滌諸鎮羽翼



神京諸所經畧既定則西羌不敢窺甘涼而吉囊俺答無能猾夏也有志未就惜哉

張勅

張勅字汝欽完縣人嘉靖己丑進士任御史氣度磊落事體練達巡山海關卓有風裁因論劾冢宰同掌道者俱回籍屢有疏薦竟未起用萬曆初進太常寺少卿致仕

何思

何思雄縣人嘉靖壬辰進士任戶部郎中氣質俊偉才力恢宏陞大同知府軍民雜處措置得宜陞巡撫

都御史戎事咸修邊方攸賴以疾在告後用臺臣薦復起宣府巡撫軍務不振舊疾作乞歸始終清淡如

一

高耀

高耀字子潛號熙齋登嘉靖乙未進士歷官戶部尚書太子太保耀里居築室城東闢種竹蒔花嘯咏其中當路先修謁者始出報謝無所造請或以事咨有關一邦利害如建麗譙行條鞭審馬戶則侃侃盡言利大溥於鄉人至接人則和易率真卽遇子行無傲頌而又大德容物甚有鄉紳後進加以不遜者亦頌

之不校爲文純雅不事矯飾所著有太保集藏於家  
蓋惇惇先進君子也以故年登耄耄子姓振振焉

### 孫 慎

孫慎號聯泉大寧都司人祖濂保定右衛百戶以孝  
行著聞有友人垂死寄一篋於濂濂俟其子至付之  
封識宛然子啟篋有白金千餘兩感泣欲折半爲報  
而濂終不受教慎如嚴師慎登嘉靖甲辰進士歷官  
御史大夫性度倜儻猷畧揮霍當鎮撫榆林秩尚僉  
都以搗虜巢首功蒙 恩錄蔭晉貳總臺風裁獨持  
歸田來尤嗜義無窮嘉惠後生閔都司學宮庠隘爲

捐資恢其制羣里中茂異與諸子攻制舉業爲館穀而督誨之登科第者多出其門族黨戚友待以舉火者數十家築灤西莊觴咏其中所著有樂府詩集藏於家

楊繼盛

楊繼盛字仲芳其先小興州人也當洪武中小興州數中虜詔盡徙其民內地得保定之容城家焉繼盛生七歲家貧父使飯牛踰年從牧所以間往里塾觀里中兒誦讀揖遜而心好之歸謂兄請得受里塾學兄曰若幼何學艷然曰夫幼者任牧牛乃不任學耶

兄言於父聽之學然不廢牧也十餘歲父喪兄坐邑  
賦踐更遂往代踐更至十三從師受經爲舉子業漸  
有聲十八補邑諸生踰冠讀書於邑寺僧舍自勵刻  
苦恒讀至夜分燈且盡瞑坐而思會寒無下襦遶屋  
行且溫誦日所臆令脛以上微暖得稍假寐明年春  
諸僧病疫且甚同舍生俱亾去獨留爲之親爨事問  
醫調藥餌僧以次愈而兄病疫亦作於是歸日夜不  
解衣而扶持亦愈時人異之爲語曰疫無鬼以爲不  
信視楊子旣爲諸生數從有司薦不利家益貧然益  
以勤苦其術業益進登嘉靖丁未進士授南京吏部

驗封司主事及與考功郎鄭公曉遊鄭公者素負鑒  
裁獨愛重之謂人曰夫夫非吾所及也因爲語古今  
成敗得失與國家章典諸郡邑吏入肄事者鉤得其  
弊乃爲嚴登籍定序先後革冒替翕然稱服是時關  
西韓公邦奇爲兵部尚書韓公大儒始從之而受樂  
三月而得其數乃謂韓公曰樂體於理而用於聲者  
也有器而後有聲夫器理所寄也乃構桐竹絲漆手  
製管和矣已製琴若瑟若簫笙塤箎之類諧而合奏  
之若一以復韓公公大悅曰技更進是乎居吾語汝  
吾欲製十二律之管管各備五音七聲而成一調何

如退而凝思廢食寢者三日夢大舜坐投以金鐘使之擊而謂之曰此黃鐘也醒而汗恍若悟者起篝燈促復製管至明而成者六已而十二管成韓公撫膺高蹈曰得之矣始吾輯志樂成而九鶴飛舞於庭其應乃在子耶韓公旣歸老語之曰樂不足以盡子吾授子以天文地理太乙六壬奇門兵陣之書乃徧習焉會諸僚有講聖門之學者又從講學人或謂此曹子什伍賣聲譽奈何中之不顧曰道在人志耳子不聞夫商丘中誘而投火以得寶者耶明年滿三載考道由山東謁曲阜孔顏氏廟徘徊於俎豆之間久之

登泰山絕頂望雲氣慨然歎天體之不盡益有志於  
學辛亥遷兵部車駕司員外郎時咸寧侯仇鸞以雲  
中騎勤王驟得兵政天子虛已聽之而侯鸞驕且  
內畏虜虜請於二邊互市市馬侯鸞主之奉以中國  
幣帛議遣使乃上疏條論其十不可五謬且曰夫此  
十不可五謬非唯公卿大臣知之三尺童子皆知之  
然而有爲陛下主其事者蓋其人內迫於國家之  
深恩而外懼虜之重勢內迫國家之深恩則圖倖目  
前之安以見效外懼虜之重勢則務中彼之欲以求  
寬宜振獨斷發明詔悉按言互市者選將練兵聲罪



致討不出十年臣請得爲  陛下勒燕然之頌懸俺  
答之首於膏街以示天下萬世疏奏  上壯之下相  
嵩等八臣議咸唯唯侯鸞忼憤曰豎子目不知虜宜  
其易之乃密疏云云上意遂中變下錦衣獄就置訊  
持論侃侃不屈獄具貶狄道縣典史狄道在陝西之  
臨洮山中其民不畏法比至敬共其職冬月受請讞  
竟暮弗倦臨洮民翕然稱楊公神明卽監司以難獄  
猶豫者輒問楊典史云何不以及令也少暇則進邑  
諸生爲講說文義大指諸生人人得意恨見晚因買  
東山超然臺剪棘立書院以居諸生祀伏羲而下至

周孔配以濂洛關閩諸賢狄道之旁地故多回夷其子弟悉習梵典召而約束焉爲立二經師而身誨其稍異者三十人諸生日益衆無所取食乃集邑吏搜飛灑者伏糧得三十石而鬻所乘馬及婦張夫人服裝買民間最重賦地二百畝白於府以伏糧予之乃倣故井田意割授諸生父兄使畝入粟以給筆札及婚喪之費又買城西廢圃使茹蔬而引洮河之水灌漑之地益以肥饒給諸生邑故有煤山生蕃制之不能開而仰給薪於二百里外乃挾衛指揮驍騎往召生蕃諭之咸服曰楊公卽須吾穹廬且舍而況此煤

山耶邑遂不苦薪爲典史狄道三年吏民愛之呼楊  
父諸生或稱關西夫子而虜數敗約入寇侯鸞奸復  
露罪至族天子思之稍遷山東諸城令之諸城月餘  
卽遷南京戶部主事之南戶部三日而遷刑部湖廣  
司員外郎復調兵部武選當是時相嵩最用事惡侯  
鸞刺骨而善繼盛之策以不得立貴之爲恨然天下  
之惡相嵩甚於惡侯鸞始遷刑部卽欲移疾歸旣復  
調兵部則中夜起坐自詔曰天子遇我厚矣我何以  
報塞張夫人從傍笑曰公休矣且歸耳公曰何謂也  
張夫人曰夫一侯鸞而困公幾死今相嵩父子百鸞

也公何以報爲休矣且歸耳公霍然大悟曰吾乃今而知所以報也於是日夜密具疏謀論相嵩抵任之十二日而疏成爲癸丑元日將上之會上方怒諸給事盡行遣謫已抵闕門矣趨出更十五日而齋齋三日乃上疏極詆嵩惡數以十罪五奸且曰臣每恨壞天下之事者惟逆鸞與嵩鸞已殛死獨嵩尚存嵩之姦惡又倍於鸞將來爲禍更甚舍此不言更無可以報 陛下者 陛下聽臣之言察嵩之姦或召問二王令其面陳嵩惡或詢諸閣臣諭以勿畏嵩威重則置之憲典以正國法輕則諭令致仕以全國體賊

臣旣去豪傑必出賞罰旣明軍威自振胡虜畏 陛  
下之聖斷知中國之有人將不戰而奪其氣聞風而  
喪其膽矣內賊去外賊除其致天下之太平何有疏  
奏 上恚其慙而相嵩方以他事得 上意構之復  
下錦衣獄詰以何自引二王對曰非二王疇不懾嵩  
者且王家事渠寧不憂爲嵩敗耶獄具詔杖至百有  
遺以蚺蛇膽謂服之可以禦杖笑曰吾自有膽何蚺  
蛇爲却之第飲一卮酒畢受杖送司寇獄劓甚至夜  
半而蘇獄吏內畏嵩屏去藥食乃碎甕碗手破諸腐  
肉血稍稍起司寇當以詐傳親王令旨絞中外駭且

怪以人臣阿私侮三尺不宜至此繼盛聞之行論從容讀書不輟且曰丈夫會有死死分耳天得無稔嵩而後僂之耶將柰國體何是時海內士大夫陰錄其疏至紙爲貴當出朝審諸中貴人夾道指目勞以酒肉袖白金而遺之至枳道不得發悉謝不受又竊指三木歎曰奈何不以囊相嵩而囊楊公也司業王先生謁相嵩謂曰公不憂萬世耶相嵩曰吾行當爲救之且卜之王先生復前說曰卜之鬼乎人乎夫人則奚卜也而卿胡植鄢懋卿曰不可公不覩夫養虎者耶乃自遺患相嵩者領之已更有蜚語聞上竟以

十月朔論死臨當赴義出所著年譜授其子應尾曰  
後十年可開也復爲詩二章其一曰浩氣迎太虛丹  
心照萬古生前未了事留與後人補其二曰天王自  
聖明制作高千古生平未報恩留作忠魂補蓋慷慨  
曼聲長嘯以沒沒之七年而相嵩姦狀大露御史林  
潤白發世蕃大逆狀論棄市籍其家貲巨萬萬嵩削  
藉寄食於人以死又三年而天子崩遺詔褒錄諸  
死諫者吏部以繼盛名居首贈太常少卿錄一子太  
學生謚忠愍祠於保定額曰旌忠

劉斯潔

劉斯潔號我山易州人登嘉靖丁未進士歷官南京  
禮部尚書爲人雅尚氣節清介剛方所至不阿權貴  
惟執法廩廩位躋八座囊無餘資居家恬靜嚴整遇  
子姓儼若朝典日夕督課之不少怠部使者取道易  
水咸爲脩謁時或一面去曾無所報謝至公府覓一  
字之干不得也庶幾有廉頑立懦之風矣

張執中

張執中號歷山清苑人中嘉靖丙午舉人由日照尹  
擢戶部主事行能廉善方駕循良晉署度支則剔奸  
蠹平出納錙銖不染廼恬介不阿竟失權相歡而歸



時年甫踰強仕家居篤於孝友仰體父意戒殺樂施  
每疫癘行卽延醫捨藥全活甚衆與弟不析箸者三  
十年育諸姪無異已子門內不失雍熙之軌焉日取  
四書五經子史折衆言羣疑而衷諸理勒成一家言  
爲諸子姪及後生先資至老不倦壽八十二部使者  
表爲人瑞品可知已

張時

張時字宗易保定易州人也少與楊太常繼盛同學  
楊兄事之嘉靖中先後舉進士楊拜南京吏部主事  
稍遷員外而時方待次公車會北虜入寇長驅薄都

城下京師戒嚴時倡言於當事者請與虜決戰當事不能用虜退復來以入貢爲名大將軍鸞上言請令塞上得納胡馬因稍易以繒帛塞南侵之望詔許之其年楊適入考調兵部客於時所遂草疏劾鸞誤國不道以稿示時時曰此疏正不可少第必無聽如聽之將令爲之當誰屬乎楊曰請以屬余某有死以報國而已時勃然作色曰丈夫死必濟國家事豈徒死耶因私往見陸太傅炳說曰大將軍議開馬市楊負外以職事宜言主上幸而見原大善有如聖怒不測使漢有殺計臣之名爲夷狄笑竊爲大將軍不取也

此其責宜在太傅太傅深然之及疏上下楊繼盛詔  
獄責問坐謫邊尉得不死後歲餘鸞伏誅楊復召還  
兵部甫至京十九日又坐劾奏嚴氏父子事論棄市  
先是楊旣之邊時亦尋以憂免至聞楊召還諫死獨  
恨弗能救又復自念業已往卽救俱死無爲也因爲  
之發喪於易水之上而服焉且爲力存其後或問君  
與楊子異乎答曰昔者伯夷太公兩人者同歸周豈  
其志不同哉然而孟津之會尚父鷹揚夷齊叩馬彼  
固各有謂耳其後六年丁巳服闋補刑部主事有詔  
令大臣各舉才堪邊寄者以聞於是九卿中三疏薦

時調職方主事其年奉使徵兵入衛西自秦中還上  
邊事因言故將某某可用從之己未遷員外郎尋出  
爲山西按察僉事備兵獨石是時邊戍久空動倚客  
兵爲援其實首鼠伏匿不敢戰所過騷然不寧邊民  
苦焉時乃始請罷客兵復屯戍稍益募壯士教練之  
久之西北傳舉烽言虜酋黃台吉且入寇時私與部  
將計曰虜入必先掠龍門龍門者宣府之右臂也龍  
門失守虜必乘勝南下逼近紅門此其爲患不小乃  
自選騎卒得七百餘人趨援龍門俄而虜果大至凡  
數萬會日暮分屯夾道爲營營長可數十里時復私

計曰虜至不知我有備且賊雖衆屯夾道道狹難猝聚可掩擊也因出死士數十人夜襲虜營營中大亂首尾不得相救盡獲騾馬牛羊以歸台吉聞之大駭黎明悉衆來攻龍門時令集民間車環以爲營以五色綵繒畫龍文衣車上出城中老弱守之而以精騎自將而前與台吉戰大破台吉兵於龍門之野我兵銳甚往往馳戟入虜壁斬騎將騎墜輒刺殺之有捕虜者謂台吉言我累歲盜邊莫我抗今若此固憤不肯退及遙望見後車車畫五綵龍文勢甚壯望之如山業思爲遁計適城中樵夫爲虜所得問得虛車狀

虜乃大笑復奮我兵猶殊死戰不可敗相持至暮所  
擊殺無數我兵死者亦百數十人虜因罷去卒保龍  
門其勇畧誠罕匹而論者乃謂其輕敵寡謀致顛越  
於我師又却客兵不用以致無成功竟下兵部議坐  
貶

陳典

陳典字敦卿大寧都司人嘉靖庚戌進士任山東東  
昌府推官擢給事中練達老成風裁懋著陞叅政按  
察使左右布政所至卓有政聲薦剡相繼爲閩中方  
伯三年人皆感德卒於官

鄭洛

鄭洛字禹秀謚襄敏中嘉靖丙辰進士授山東登州府推官選廣東道御史歷官至兵部尚書爲直御史又爲名藩臬以至開府建牙節制經畧其壯猷偉伐功在封疆居家明農積粟三千石以歲之無年捐二千石以賑闔邑接待里人無論士大夫卽齊民亦與之平等揖讓里人士生則頌義歿則致哀焉

許大亨

許大亨字貞甫安肅人登嘉靖乙丑進士授山東兗州府推官卽辨張子時之寃人號神明徵拜御史初

按雲南至則却樣金珠寶累巨萬而又奏免採金之額劾黔國沐朝弼之暴滇人至今尸而祝之再按蘇松以不阿江陵相國轉漢中知府遂疏請休致歸家杜門謝客片刺不入公府母病籲天以代夢賜良醫而疾果愈蓋真正直立朝孝友宜家者矣

劉兌

劉兌新安人中隆慶丁卯鄉試初知陝西富平以治行高等擢戶部主事去之日邑人愛慕不忍釋管太倉銀庫盡釐風蠹卽權貴無敢干以私三年積羨金四十萬尋陞員外管餉代州二年復積羨金二十萬



毫不以潤私橐又置倉實穀萬石以濟州人尋陞靖  
虜道叅議政績益茂請告無幾尋蒙特旨起肅州道  
叅議前後蒙 賜鎡寶者三蓋異數也其居家置義  
田立義學修橋梁以惠宗黨里閭者尤難縷指所著  
有靖虜議二卷新安考二卷淑世談數十卷大有裨  
於國事風教者

甯化龍

甯化龍字文明號雲田保定新安人生五歲始能言  
比就外傳一意問學年十四補弟子員萬曆丙子舉  
於鄉丁丑第進士戊寅授中書舍人己卯冊封周藩

壬午陞工部都水司員外郎視慈寧宮養心殿諸工程夙夜勤事有尚方膳醴之賜甲申督理京城街道卽以其年權稅荊州化龍至荆王在禁奸節費通商惠民比得代課無溢額橐無私裝荆之人士爲詩歌以頌之丁亥督修胡良巨馬二橋日與中貴人處調停節縮不激不隨工竣賜白金文綺晉虞衡司郎中加俸一級其主虞衡一切規畫厝注誠心爲質爲大司空所倚辦聲稱藉甚巳丑陞山西按察司副使備兵赤城赤城密邇虜巢青把都安免諸酋環其外而史車二夷處其內爲邊陲重地化龍爲明約束嚴號

令懲偷惰之習清虛耗之蠹凡所經理悉綢繆大計  
謂龍門虜衝獨石隔遠裨將一人難於兼制白於部  
使者增叅將一人分守其地庚寅史車二夷逸出塞  
議者紛紛遂至易置諸將吏乃移化龍潼關化龍無  
幾微見詞色卽候代猶日督將士嚴兵保境若寇至  
者未幾史酋率所部寇龍門化龍督遊擊杭大才與  
戰於唐子衝擒酋女所捕虜斬獲甚衆旣至潼關念  
關地據黃河上游控制三省秦之襟喉急以暇日塹  
土堙谷練兵積餉關若益雄而盜賊屏息壬辰陞山  
西布政司右叅政理屯糧覈逋負滿三載陞陝西按

察使適當計吏其臧否一裁以至公至盟於神誓不欲以愛憎爲毀譽戊戌陞山西右布政使己亥陞陝西左布政使以便歸省抵家而疾作遂卒年五十有

一  
邊 靜

邊靜字以寧慶都人由監生任遼東廣寧衛經歷父友諒嘗得危疾以寧嘗其糞味甜滑晝夜憂悶父病尋瘥越二年父卒以寧晝夜哀號七日幾絕葬畢廬於墓側值以松栢時天旱少雨樹將枯槁朝夕竭力汲水灌溉墓傍泉忽湧出松栢得以茂盛人皆以爲

孝感所致有司以聞 朝廷旌表其門

張英

張英字世傑完縣人任大寧都司都指揮僉事性至孝母趙氏年七十餘患傷寒疾屢醫弗効英憂甚禱於上下欲以身代母疾轉劇供奉晝夜衣不解帶藥必親嘗踰月默禱於神刲股煎湯調服卽愈越數年母患癰疽英令妻遮其母目吮三次不日而愈人皆謂其孝感有司上其事旌表其門

補遺

楊寧

楊寧字振方新城縣人景泰五年進士六年除河南道御史天順初劾太監曹吉祥總兵石亨擢鴻臚寺少卿累陞禮部右侍郎卒

楊潭

楊潭字宗淵別號紫泉保定新城人成化丁未進士授刑部主事審克簡孚獄無冤滯弘治癸丑丁外艱服闋擢光祿寺丞供億繁夥出納詳明百務胥飭陞本寺少卿正德改元奉命祭告海岳回上民瘼四事切當時務未幾轉南京大理寺丞始至卽視篆適魏國僕以謀殺人犯大辟鞠得竟寘于法改北大理進

少卿于時逆瑾掌內廠專事羅織其叅送諸獄每乖  
正法潭一奉國法堅執不阿廣寧伯義男爲其叔毆  
死瑾坐抵命曰縱使親侄孫法且不死矧義男孫乎  
不從瑾銜之乃摺摭他事罰出穀五百石已陞光祿  
卿擢戶部侍郎總理倉場 命初下會征討流賊改  
以隨軍督餉因請發帑銀分路收糴復取存留者從  
權協濟劾奏山東巡撫張鳳酗酒怠政捕盜都憲甯  
杲及指揮江彬貪功妄殺併論諸將老師玩寇疏入  
上嘉之鳳坐落職餘罰治有差風裁凜然盖自是諸  
師始協謀戮力而賊平矣捷奏晉俸一階蔭子入監

復拜命督餉于宣大時虜寇壓境兵馬大集區畫有方儲精不匱事竣還上賜麟袍及金幣復蔭子如初陞本部尚書總理倉場先是督倉中貴率憑藉專慢相見接遇以禮而事不與議且歸併剩糧革久濫官攢以祛煩擾平收斛面以絕通賄人咸服其剛正改蒞部事適寧藩遘變上親征百官景從供應急于星火加以恩倖之賞賚無紀客兵之支費益增劑量計處日不暇給隨取具足中外倚之考績上遣中使頒賜羊酒楮幣辛巳夏以倦勤懇乞骸骨再上始得旨甲午卒計聞命禮官諭祭者二命工部營



葬事恩遇始終人咸榮之

魏彥昭

魏彥昭字德輝容城縣人弘治十二年進士由行人選山西道御史巡鹽河東建言降利津縣丞陞魚臺知縣累陞江西叅議致仕

王重賢

王重賢字子尚交河縣人正德十二年進士由卽墨知縣選浙江道御史建言廷杖降壽州判官陞嘉定知縣累陞江西僉事致仕